



MEMORANDO DE ENTENDEMENTO PARA A CREACIÓN DA MACRORREXIÓN “RESOE”

En Valladolid, o 17 de setembro de 2010

REUNIDOS

Dunha parte, o Excmo. Sr. D. Alberto Núñez Feijóo, presidente da Xunta de Galicia, nomeado polo Real decreto 630/2009, do 17 de abril, e en virtude das facultades conferidas polos artigos 15 do Estatuto de autonomía de Galicia e 24 da Lei 1/1983, do 22 de febreiro, de normas reguladoras da Xunta e da súa presidencia.

Doutra parte, o Excmo. Sr. D. Juan Vicente Herrera Campo, presidente da Junta de Castilla y León, nomeado polo Real decreto 864/2007, do 28 de xuño, en virtude das facultades conferidas polos artigos 27.1 do Estatuto de autonomía de Castilla y León e o 6.5 da Lei 3/2001, do 3 de xullo, do Goberno e da Administración da Comunidade de Castilla y León.

E doutra parte, o Excmo. Sr. D. Carlos Cardoso Lage, presidente da Comisión de Coordinación e Desenvolvemento Rexional da Rexión Norte de Portugal, creada polo Decreto lei n.º 207/2006, do 27 de outubro, nomeado polo despacho n.º 2665/2010, do 10 de febreiro, publicado no Diario da República 2ª serie, n.º 28.



MANIFESTAN

As especiais relacions existentes entre Galicia, Castilla y León e a Rexión Norte de Portugal debido, entre outras razóns, á súa proximidade e ao feito de seren limítrofes, deron lugar a unha boa veciñanza que permitiu establecer múltiples e sólidos lazos entre ambas as comunidades e a Rexión Norte de Portugal. Mostra desta estreita colaboración son os acordos que xa existen entre as partes para a realización de programas e proxectos comúns en beneficio dos seus habitantes en distintos ámbitos, así como as comunidades de traballo existentes entre Galicia e a Rexión Norte, e entre Castilla y León e a Rexión Norte.

Castilla y León, Galicia e a Rexión Norte de Portugal comparten a fronteira de España con Portugal e esta situación xeográfica constitúe un dos trazos comúns que caracteriza as súas respectivas identidades rexionais. O desenvolvemento das zonas fronteirizas de Galicia, Castilla y León e Portugal foi obxecto de atención preferente por parte dos seus gobernos no marco das relacións de cooperación transfronteiriza e interrexional e configúrase como un obxectivo estratégico común no futuro.

A Xunta de Galicia e a Rexión Norte de Portugal teñen constituída unha Comunidade de Traballo desde o 31 de outubro de 1991. O 24 de febreiro de 2006 adaptáronse os seus contidos ao establecido no Tratado entre o Reino de España e a República Portuguesa sobre cooperación transfronteiriza entre entidades e instancias territoriais, asinado en Valencia o 3 de outubro de 2002.



XUNTA DE GALICIA

Junta de
Castilla y León

A Junta de Castilla y León e a Rexión Norte de Portugal desenvolven os seus traballos de cooperación a través dunha Comunidade de Traballo constituída en Bragança o 19 de xaneiro de 2000. O 27 de xaneiro de 2009 adaptáronse os seus contidos ao establecido nas prescricións do precitado Tratado de Valencia.

As partes asinantes fundamentan esta cooperación nunha nova dimensión política de relacións intergovernamentais, interrexionais e de cohesión territorial europea. Basean, por outra parte, o seu novo marco de cooperación na constatación de que comparten recursos e intereses comúns, así como problemas e posibilidades de solución conxuntas con potenciais creacións de economías de escala e de valor engadido.

A mundialización crecente ofrece hoxe en día aos actores territoriais unha serie de oportunidades de cooperación que poden ir máis aló do marco tradicional, forxado a través das Comunidades de Traballo, aínda que sen vocación de substituílo. É, pois, necesario encarar as novas realidades que están xurdindo a longo prazo de forma que nos permitan explotar plenamente o noso potencial. A cooperación inter rexional que mediante este protocolo se aborda pretende o establecemento de sinerxías e complementariedades que favorezan o desenvolvemento dunha macrorrexión e constitúan o núcleo inicial dun posible ámbito de actuación ampliado naqueles campos en que poidan existir posibilidades de cooperación con outros futuros actores.

Por isto, os asinantes deste acordo desexan reflectir nel a súa vontade expresa e determinación firme de non só manter senón tamén incrementar o espírito de colaboración que caracterizou as súas relacións, sentando as bases para isto mediante a formalización deste Memorando de Entendemento de acordo coas seguintes

Handwritten signatures in blue ink, likely belonging to the signatories of the agreement.



CLÁUSULAS

Primeira. Institucional

Co fin de favorecer e impulsar a cooperación entre as partes asinantes, acordan constituír un organismo sen personalidade xurídica que se designará Macrorrexión, “Rexións do Suroeste Europeo”, en diante designada abreviadamente “RESOE”, e que se rexerá polo establecido neste memorando de entendemento e polas normas de funcionamento que as partes acorden.

Consideran que a escala macrorrexional resulta máis adecuada para a implementación de determinadas políticas, especialmente nos campos da economía do coñecemento e a sociedade dixital, o ambiente, o emprego, a cultura ou o turismo. En consecuencia, os asinantes deciden unir esforzos nas súas tarefas de representación exterior, colaborando en actuar de forma coordinada á hora de defender nos distintos foros os seus intereses comúns.

Deciden, ademais, realizar unha estratexia conxunta, así como proxectos comúns e presentalos ante as institucións nacionais, cando así proceda, e organismos europeos, así como intercambiar información e fomentar a participación mutua nos distintos foros de cooperación transfronteiriza, interrexional e transnacional en que as partes teñan presenza.

No escenario que debuxa a “Estratexia 2020 da Unión Europea”, que busca un crecemento máis forte, sustentable e innovador a través, entre outros mecanismos, dun novo marco de gobernanza económica, as partes asinantes coinciden en demandar un incremento dos fondos comunitarios destinados á cooperación territorial, polo menos ata o seu nivel nos anos 90.



XUNTA DE GALICIA

Junta de
Castilla y León

Consideran necesaria a preparación dunha estratexia de ámbito macrorrexional que incida nos ámbitos sinalados neste Memorando.

Segunda. Economía e industria

No ámbito industrial destaca a importancia que na Macrorrexión ten o sector da automoción. Nesta materia, ante os retos xurdidos como consecuencia da crise económica e da restrición do consumo, resulta adecuado o intercambio de experiencias dos entes de promoción económica no seu obxectivo de dinamización deste sector estratégico e os seus incentivos ao consumidor final.

Considérase fundamental dentro de sector da automoción o establecemento de alianzas estratégicas dunha industria de fabricantes e componentes moi ampla e importante para a Macrorrexión, fomentando a creación de clústers empresariais en sectores de actividade común, así como entre estes, os centros tecnolóxicos especializados e as universidades.

Destaca tamén na Macrorrexión o sector alimentario, sector estratégico que concentra esforzos entre o sector primario e o daúa industria de transformación. A evolución das tendencias de consumo e a necesidade de asegurar a subministración de materias primas procedentes fundamentalmente dos produtores locais impulsan a necesidade de estratexias comúns, con intercambio de experiencias tanto públicas como privadas nos ámbitos de produtos de calidade, novos produtos e canales de distribución.

As partes signatarias atribúen un valor especial á cadea de valor ligada ao clúster da moda, creada a través das alianzas estratégicas entre os diferentes elos desde a produción ata a comercialización da industria dos

téxtiles, a moda, os accesorios, o calzado e a decoración, por constituir un importante sector de creación e mantemento de emprego.

Así mesmo, convén incorporar ao ámbito macrorrexional aqueles sectores que pola súa importancia para o medio rural e pola posibilidade de proporcionar á cadea de valor materias primas constitúan un motor para a creación de emprego. En particular, neste protocolo promoverase a colaboración nas actividades relacionadas coa Madeira e o Móble, así como coa Pedra Natural ou coas Enerxías Renovables como a eólica, a hidrálica ou a solar. Do mesmo modo, e con carácter xeral, as partes comprométense a establecer unha dinámica habitual de colaboración noutros possibles sectores ou asuntos relacionados coa economía e a industria que poidan xurdir durante a vixencia deste Memorando.

Terceira. Educación, universidades e investigación

No ámbito universitario, é de grande interese para as partes unir esforzos para impulsar a creación dun espazo de excelencia universitaria dentro do Espazo Europeo de Ensino Superior que implique as Universidades da Macrorrexión, que impulse a máxima oferta de dobles titulacións e fomente o intercambio de alumnos e profesorado, así como a mellora da investigación e da docencia.

Igualmente, no terreo da investigación científica e tecnolóxica, os asinantes consideran relevante, centrándose nas áreas científicas das áreas estratéxicas, fomentar singularmente o intercambio de experiencias e a realización de programas conxuntos, así como compartir experiencias en materia de plans de apoio á relación Universidade-Empresa, internacionalización en materia de I+D+i e dos modelos de financiamento dos respectivos sistemas.



Así mesmo, con base na experiencia de traballo conxunto das Universidades e Centros de Investigación da Macrorrexión en campos como a nanotecnoloxía, a oftalmoloxía e outras árees orientadas á investigación, a formación continuada de grao e de posgrao e a transferencia de coñecemento cara ás empresas do sector, os asinantes consideran de especial interese a continuidade e o impulso da cooperación nestas árees clínicas as súas aplicacións a outros campos.

Cuarta. Ámbito laboral

Nesta materia concreta xa se realizan entre as partes asinantes traballos conxuntos no marco de proxectos europeos que pretenden contribuír ao impulso da mobilidade transfronteiriza a través do emprego, a formación e o traballo en común das oficinas e centros de emprego, tratando de dinamizar e articular os mercados laborais aos dous lados da fronteira.

Ante esta situación, as partes deciden dar un pulo a estas políticas co fin de lograr unha maior potenciación do emprego e as relacóns laborais, e facilitar o intercambio de coñecementos e experiencias, para o que se comprometen á realización de actuacións e programas de maneira coordinada naqueles ámbitos, territoriais ou sectoriais, en que existan sinerxías á hora de programar actuacións, co obxectivo concreto de aproveitar as experiencias positivas en materia laboral no desenvolvemento de proxectos innovadores, así como de realizar de maneira coordinada achegas á normativa europea do ámbito laboral, así como á modificación da normativa existente.

A series of handwritten signatures in blue and gold ink, likely belonging to the signatory officials, are visible along the bottom left margin of the page.

Quinta. Ambiente

A Macrorrexión conta cun riquísimo patrimonio natural, que proporciona múltiples posibilidades de cooperación nesta materia, polo que, entre outras actuacións:

As partes propoñen o impulso de actuacións encamiñadas a unha coordinación na xestión por parte das administracións implicadas dos territorios con valores semellantes que integren a súa rede de espazos protexidos e, en especial, desenvolver unha xestión coordinada dos espazos naturais declarados como protexidos e dos integrantes na Rede Natura 2000, que repercutiría favorablemente na súa difusión e na súa conservación. Neste mesmo sentido buscarase aproveitar os equipamentos e elementos existentes destinados á mellora do coñecemento da súa biodiversidade e da etnografía destes espazos, tanto para o seu aproveitamento pola poboación en xeral como en campañas dirixidas a sectores específicos da poboación, como son, por exemplo, os escolares.

As partes determinan a conveniencia de estudar a coordinación da xestión de especies emblemáticas con condicións parellas.

A Macrorrexión conta con territorios dunha importante riqueza forestal e ambiental, polo que os incendios forestais que se producen nese contorno teñen consecuencias en todos os territorios próximos. Por isto se propón fomentar unha xestión coordinada que permita oficializar a posibilidade de intervención de cada unha das partes nos incendios que se produznan noutras. De igual maneira, comprométense a favorecer o intercambio de experiencias en materia preventiva e de formación.

As partes asinantes comprométense igualmente a dedicar unha especial atención ás cuestións fitosanitarias, privilexiando á vertente de investigación daquelas especies que ocupan actualmente maior extensión

territorial, así como tamén a aquelas especies forestais más nobres e de crecemento máis lento.

Sexta. Cultura e turismo

Os membros da Macrorrexión comparten un vasto patrimonio histórico e cultural, e por isto manifestan o seu compromiso de estudar e levar a cabo proxectos comúns nesta materia. Particularmente, impulsando a xestión coordinada de programas de desenvolvemento local e territorial en relación aos bens patrimoniais, as manifestacións artísticas de especial relevancia común como os bens arqueolóxicos e a arte rupestre, os monumentos relacionados coa época do románico, así como o patrimonio común etnográfico. Prestarase, ademais, unha especial atención ás industrias creativas como expresión da modernidade cultural representada por este espazo xeográfico.

Así mesmo, expresan o seu compromiso de estudar proxectos comúns establecendo canles de comunicación e de actuacións conxuntas en materia de promoción cultural, intercambiando información en materia de arquivos e bibliotecas, cooperando no deseño de accións conxuntas de dinamización ou difusión de recursos comúns, como a promoción dos camiños de Santiago ou como os bens declarados patrimonio cultural da humanidade pola UNESCO, así como para o establecemento de rutas e itinerarios culturais e turísticos conxuntos, ou outras que poidan determinar as partes.

Ademais, a xestión conxunta dos seus valores, así como a promoción conxunta dos seus destinos turísticos pode redundar nunha maior eficacia na captación de turistas e na potenciación do ámbito territorial en que desenvolven as súas competencias os integrantes da Macrorrexión como un único destino turístico.

Sétima. Transportes e Loxística

A Macrorrexión considera e declara que os seus membros deben e poden compartir estratexias para obter sinerxías e lograr un maior impacto e eficiencia nas accións que desenvolvan en todos os modos de transportes e loxística. A Comisión Europea adoptará o Libro Branco sobre o futuro dos transportes, que incluirá un programa de acción ata 2020. É por tanto obrigado integrar as accións que este libro branco porá de manifesto e que serán requiridas para alcanzar o obxectivo da modernización do sector dos transportes, e os asinantes comprometeranse a apoiar a rede de transportes que estruture todos os territorios das partes, como forma de integrar os espazos e poboacións de forma que estes se vexan influenciados polas sinerxías e os impactos positivos que unha rede de transportes e loxística implica.

Os membros da Macrorrexión destacan o interese común que teñen os transportes e a loxística, polas súas circunstancias territoriais, e destacan a necesidade de que estas políticas teñan incidencia na Estratexia 2020 da UE, considerando o seu gran potencial e dada a importancia das iniciativas previstas nela destinadas a promover o transporte baixo en emisíons, o desenvolvemento de tecnoloxías innovadoras, as redes de transporte e loxística eficientes, a solución a problemas como a conxestión do tráfico, así como o fomento das interconexións de redes e modos de transporte.

Neste contexto, e tendo en conta a estratexia para unha política marítima integrada que as autoridades comunitarias están desenvolvendo, as autoestradas do mar e a modernización do sistema de transporte é considerada crucial posto que este sector constitúe un elemento decisivo para a economía. Por tanto, a integración de políticas sectoriais permiten formular esta estratexia de modo que se reforce o *hinterland* dos portos e as plataformas dos membros da Macrorrexión mobilizando os numerosos



recursos existentes no territorio para que a grande oportunidade dos portos atlánticos reverta no conxunto dos cidadáns da Macrorrexión. Por isto, as rexións uniranse aos traballos que, tanto a nivel rexional, como nacional e europeo, comezaron a desenvolverse neste ámbito.

Oitava. Outras áreas de interese

A Macrorrexión fomentará a cooperación no intercambio de experiencias, resultados e boas prácticas, así como na realización de proxectos conxuntos noutras áreas que poidan ser de interese para as partes. Todo isto co obxectivo da mellora da calidade de vida da poboación da Macrorrexión, así como para a xeración dun espazo para a construcción da convivencia e a cidadanía.

Novena. Presidencia, Comité de Seguimento e grupos de traballo

A Macrorrexión RESOE estará presidida de forma conxunta e simultánea polos presidentes das rexións membros dela.

Tras a sinatura deste Memorando de Entendemento constituirase un Comité encargado do seguimento, da coordinación e da aplicación das medidas incluídas neste documento. O Comité de Seguimento estará composto polos conselleiros ou cargos políticos responsables en materia de acción exterior de cada unha das partes asinantes deste Memorando. As tarefas propias do Comité de Seguimento serán lideradas de forma rotatoria anual por cada un dos representantes de cada rexión no Comité de Seguimento.

A series of handwritten signatures in blue ink, likely belonging to the presidents of the member regions, are placed here.



XUNTA DE GALICIA

Junta de
Castilla y León

O Comité de Seguimento creará, cando se considere necesario, grupos de traballo para cada unha das áreas de actuación definidas por este Memorando ou que puidesen considerarse oportunas. Estes grupos de traballo terán como obxectivo a realización de proxectos conxuntos, así como o impulso e coordinación de cada área de actuación. Estarán coordinados polo Comité de Seguimento e formarán parte deles representantes da sociedade civil tales como organizacións empresariais e sindicais, Universidades e outras asociacións, organizacións ou institucións que total ou parcialmente puidesen desenvolver actuacións que contribúan á consecución dos obxectivos da Macrorrexión.

Poderán adherirse a este Memorando de Entendemento outras rexións, logo de solicitude e mediante acordo unánime da Presidencia da Macrorrexión.

Décima. Eficacia e vixencia

Este memorando entrará en vigor unha vez que as partes asinantes leven a cabo, naqueles casos en que sexa preciso, por causa das normas estatais ou rexionais ou polas súas propias normas de funcionamento, os trámites oportunos.

Este memorando de entendemento terá unha vixencia anual prorrogable tacitamente, sen prexuízo da súa extinción por denuncia unilateral ou por mutuo acordo das partes. No primeiro caso deixará de estar en vigor seis meses despois da data en que sexa comunicada tal determinación ás outras partes.



XUNTA DE GALICIA

Junta de
Castilla y León

En proba de conformidade asinan este memorando de entendemento
no lugar e data sinalados no encabezamento.

O Presidente da
Xunta de Galicia

Alberto Núñez Feijóo

O Presidente da
Junta de
Castilla y León

Juan Vicente Herrera
Campo

O Presidente da
Comissão de
Coordenação e
Desenvolvimento
Regional do Norte

Carlos Cardoso Lage